

DIARII

I LUGLIO MDXXIX. — XXX SETTEMBRE MDXXIX

1

Del mexe de Luio 1529.

A dì primo Luio, fo San Marcilian, zorno celebrado, che officii nè banchi sentano, perchè in tal zorno si have tre vitorie assà memorande.

Introno Cai del Conseio di X sier Nicolò di Prioli da San Felixe nuovo, sier Andrea Donado qu. sier Antonio el cavalier, stato un'altra volta, et sier Nicolò Tiepolo el dottor, nuovo. *Item*, Savi a Terra ferma sier Hironimo da chà da Pexaro qu. sier Nicolò, sier Giacomo Dolfin et sier Hironimo Grimani, tutti tre nuovi.

Item, introe consier de sopra sier Francesco Foscarei el vechio, electo del sestier de Castello, in loco de sier Marin Corner stato zorni et mexi ... amalato, et per un mexe che li manca è stà contento che 'l consier electo entri in suo loco.

Vene in Collegio l' orator de Franza domino Zuan Joachin, et fè certi discorsi zereca la venuta de l' imperator in Italia. Poi disse de turchi, se venisero in Golfo, quasi per sotrar quello volesse dir el Serenissimo, qual disse se staria a veder, et certo se vederia gran cossa, do imperadori, li primi del mondo.

Vene l' orator di Fiorenza, domino Bortolomio Gualleroti dotor, et monstrò lettere da Fiorenza, di X, di 26, con l' aviso di Franza, per lettere di 17 zugno, dal suo orator Carduzi, in conformità de quello si have heri sera dal nostro orator.

Vene l' orator de Ferara, qual *etiam* lui comu-

nicoe alcune nove habute dal suo Signor zerca a Napoli Hironimo Moron era stà dà per morto.

La terra, di peste, heri do, lochi novi, et 9 de altro mal.

Fo scritto a Ravena per Collegio a sier Alvise Barbaro proveditor zeneral, atento sono de li 4 monasteri de frati molto richi, *videlicet* Santa Maria in Portico, Classis, San Vital et San Zuan Battista, i quali non è stà mai richiesti a prestar a la Signoria, come hanno fatto li altri monasteri, però li debbi chiamar li abati et priori de ditti monasteri et persuaderli a voler prestar a la Signoria, *maxime* havendo questo anno tanta intrata; facendoli intender che, non volendo servir, saranno tanzadi come è stà fatto a tutti li altri monasteri del dominio nostro: et avisi subito la risposta.

Fu terminato far hozi poi disnar Collegio de la Signoria et di novo chiamar molti a imprestar, che non venero, et, non venendo *etiam* hozi, tansarli justa la parte.

Vene in Collegio sier Tomà Lippomano, venuto podestà et capitano di Feltre, vestito damaschin negro, in loco del qual andoe, *etiam* per danari, sier Zuan Francesco Gradenigo qu. sier Lionello, et referite de quelle cose di Feltre. Et come marti a di 29 se parti di Feltre, nel qual zorno zonseno alcuni feltrini stati a la fiera di Trento, et disseno come questo san Zuane, che è stà fatta la fiera de li, erano partiti do capitanei per levar li lanzinech, *videlicet* Marco Svit et Prospero (*Gaspero*) Fransperg, fo fiol del capitano Zorzi, et che li danari de